



Belén Kock-Marchena

E luna aki nos ta presenta bo un poeta y declamado masha gusta riba nos isla, cu ya pa mas di un decada a sa di cautiva e curason di nos hendenan cu su poemanan. Cera conoci cu señora Belén Kock-Marchena.

For di ki tempo Sra. Belén a cuminsa skirbi poema?

Ya for di tempo cu mi tabata studiando pa maestra di skol na Curaçao mi tabata tene un dagboek, den cual mi tabata skirbi mi inspiracionnan. Na comienso mi tabata skirbi mi poemanan den e idioma Hulandes, dor cu e tempo ey tabata existi e creencia ainda cu Papiamentu no ta un idioma, sin no simplemente un dialecto. Pero un cambio drastico a bin den e pensamiento aki, ora un grupo di maestro a cuminsa promove nos idioma Papiamentu, dunando e asina e balor cu e merece.

Con Sra. Belén ta haya e inspiracion pa crea un poema?

E inspiracion mi por haye na cual kier momento. Esey por sosede durante dia, pero mayoria di biaha mi ta haya mi inspiracion mey mey di anochi, ora cu tur

hende ta drumi y tur cos ta keto. Semper mi ta bisa hende cu mi fuente di inspiracion ta mi Creador. Ta p'esey mi poemanan semper a sa di alimenta e alma di nos hendenan, pasobra nan ta hopi spiritual.

Fuera di skirbi poema, Bo ta declama tambe?

Si. Semper mi a gusta e arte di declamacion. Na comienso mi tabata declama poemanan di otro escritor, manera p.e. Digna Laclé-Herrera y Filomena Wong y despues cu mi a cuminsa publica mi obranan, mi a cuminsa declama mi propio poemanan. Mi a yega di haci declamacion localmente, como tambe internacionalmente. Local mi a yega di declama poemanan pa p.e. Kunstkring, Amnesty Internacional, Biblioteca Nacional, etc. Riba nivel internacional mi a participa p.e. na un festival multi-cultural na Hulanda

na aña 1994 y su siguiente aña mi a bay Curaçao pa declama algun di mi poemanan, riba invitacion di e gran poeta y declamado di Antiyas, esta



Nidia Ecury.


Cuanto poema di Sra. Belén a wordo publica te awor aki?

Na aña 1994 nan a usa mi poema yama "Juffrouw, ik heb een bôter meegebracht!" pa un poster pa yuda promove e uso di nos idioma papiamento na nos scolnan. E siguiente aña mi a publica mi promer gedichtenbundel yama "Vibracion di Amor". Na aña 1998 mi a publica e obra "Milager" (traduci na Ingles) y na aña 2001 mi a publica mi delaster obra yama "Den bena di bida" (traduci na Hulandes). Mi ta hopi contento cu tur mi obranan a wordo bon ricibi.

Sr. Belén su casa tambe ta gusta skirbi?

Si. Mi casa Dolfi Kock tambe semper a gusta skirbi. Recientemente el a caba di skirbi su promer buki di mucha yama "E gulido golos", cu a wordo ilustra dor di nos yiu homber Richie Kock.

Henter nos famia ta masha entusiasmo cu e publicacion di e buki aki, dor cu nos tur a contribui, na un manera of otro, pa hacie un realidad.





Un Dia den Bida

Poentje Castro

Cel.: 592 2362 E-mail: undiadenbida@setarnet.aw

